

CUSSEGL GROND

Sessiun da favrer 2024

Dumonda Bisculm Jörg concernent la serrada da l'ura da consultaziun per Long COVID en l'Ospital chantunal dal Grischun

Dapi intgins onns vegniva purschida en l'Ospital chantunal a Cuira in'ura da consultaziun spezialisada per pazientas e pazients cun Long COVID. Questa ura da consultaziun per Long COVID era renconuschida sin plaun surregiunal e vegniva utilisada ed apprezziada fitg. Per bleras pazientas e pazients era ella savens il sulet radi da speranza per il tractament da lur restricziuns massivas pervia da COVID-19. Correspundentamain lung era er il temp da spetga per survegnir in plaz da tractament. La qualitat da viver da pazientas e pazients cun Long COVID è per part fitg restrenschiada. Las persunas pertutgadas, ch'eran dal tuttatatg fittas avant ch'ellas han survegni COVID-19, pateschan d'ina stancladad massiva e da spussada e na pon betg pli lavurar e dumagnar lur vita quotidiana. Per far sport e per activitads da temp liber n'han questas pazientas e quests pazients pir da dretg nagina energia. Igl è fitg difficil da tractar il sindrom post-COVID. Il grad da la chargia sto adina puspè vegnir adattà. Gia las pli pitschnas surpretensiuns pon chaschunar ina recidiva massiva, in uschenumnà crash. L'ura da consultaziun per Long COVID n'era betg mo qua per tractar las pazientas ed ils pazients pertutgads, mabain er per far perscrutaziun. En l'Ospital chantunal a Cuira han ins pudì far progress impurtants, p.ex. areguard medicaments efficazis. Dad oz a damaun vegn ussa serrada questa purschida. Ils motivs en la gronda chargia da lavur e la mancanza da persunal en il team da tractament ed il fatg che autras gruppas da pazientas e pazients vegnan eventualmain dischavantagiadas. Tenor rapports en las medias pertutga la serrada var 100 persunas. Ellas perdan immediatamain il sulet post da consultaziun da quest gener en il chantun. Serrada vegn numnadamain tant l'ura da consultaziun persunala sco er il post da contact per posta e per telefon. Novas pazientas e novs pazients na vegnan betg pli admess. Crudar davent croda er il post spezialisà per medias e medis e per autras expertas ed auters experts medicinali.

Las sutsegnadras ed ils sutsegnaders drizzan perquai las suandantas dumondas a la Regenza:

1. Co stima la Regenza las consequenzas da la serrada da l'ura da consultaziun per Long COVID en l'Ospital chantunal per il tractament da persunas pertutgadas da Long COVID en il chantun Grischun?
2. Co giuditgescha la Regenza l'impurtanza da cuntinuar cun in'ura da consultaziun per Long COVID en l'Ospital chantunal u eventualmain en in'autra instituziun adattada?
3. Tge po la Regenza far per procurar che l'ura da consultaziun per Long COVID vegnia cuntinuada e mantegnida, uschè ditg ch'il basegn exista, e co giuditgescha la Regenza sia responsabladad en questa fatschenta?

Cuira, ils 14 da favrer 2024

Bisculm Jörg, Mani, Holzinger-Loretz, Atanes, Bachmann, Bardill, Baselgia, Beeli, Bergamin, Biert, Binkert, Bischof, Brandenburger-Caderas, Caluori (Panaduz), Casutt, Collenberg, Degiacomi, Della Cà, Derungs, Epp, Föhn, Furger, Gansner, Gartmann-Albin, Gredig, Hoch, Kaiser, Kohler, Krättli, Kreiliger, Mazzetta, Michael Beni (Donat), Müller, Nicolay, Oesch, Preisig, Rettich, Rusch Nigg, Rutishauser, Said Bucher, Schläpfer, von Ballmoos, Walser, Widmer, Wilhelm